



partii naleraq

Nuuk 4. oktober 2018
Hans Enoksen Partii Naleraq

Uunga siunnersuut: Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata allangortinneqarnera pillugu Inatsisartut inatsisaat nr. xx, xx. xxx 2018-meersoq (Taarsigassarsianik sioqqutsilluni akiliisarneq)
(Ineqarnermut Attaveqatigiinnermullu Naalakkersuisoq)

Siullermeenera

Inissianik aningaasalersuisarneq pillugu inatsisartut inatsisaata allangortinneqarnissaanik siunnersuut saqqummiunneqartoq Partii Naleqamiit oqaaseqarfigissavarput.

Innuttaasut kikkulluunniit tamarmik inissaqarnissaasa qulakkerneqarnissaat politikikkut pisussaaffigaarput naammassissallugu. Kisiannili taamatut tamatta eqqarsartaraluarluta uggornarluinnartumik tamanna angusinnaasimanngilarput innuttaaqatitsinnut inissaaleqisunut ajorluinnartumik atugassaqartitsineq kinguneqartoq tamanna takusinnaallugu nassuerutigisariaqarparput.

Inuup kialluunniit pisinnaatitaaffigaa namminerisamik ineqarnissani. Tamannalu pisinnaatitaaffik tamakkiullugu aaqqinniartariaqalerparput. Issittumiippugut ilagut inuit inissaqanngitsut silaannarmiitissinnaangilagut taamaattumik aaqqinniartariaqarput aningaasaatillimmi kisimik illussaqartinneqarlutik inissinneqarsinnaanngillat.

Ilaqtariippassuit ingerlalluarnerusinnaagaluartut inissaqarnikkut aaqqiiffigineqarunik qularnanngilluinnarpoq pingaartumik meerartallit eqqarsaatigalugit. Ineqarnikkut aaqqissuusseqinnissaq piaartumik aallartinneqarnissaat aamma kammattuutigaarput tassami ineqarnikkut aamma akit qaffakkiartuinnartut inissiallu aserfallassimasut akiminnut naleqqukkunnaavipput pingaartumik innuttaasut isertitamikkut appassisumik inissisimasut utoqqaallu eqqarsaatigalugit.

Taamatut oqaaseqariarluta taava inatsissatut siunnersuut naatsumik oqaaseqarfigissavarput. Innuttaasut namminerisamik inissianik peqarnissaanik anguniagaqarneq soorunami akerlerineqarsinnaanngilaq, aammalu inissianik pisisimanermi siusinnerusumik akiliisinaanermik periarfissiinarneq tamakkiisumik Partii Naleqamiit taperserparput.

Taamatut oqaaseqarluta ataatsimiititaliami suliarineqarnissaa innersuusutigaarput.